

Pertunjukan Kebudayaan Anak Kapal Tentera Laut 16 Negara Serikan LIMA '13 Bernama 15 Mac, 2013

LANGKAWI, 15 Mac (Bernama) -- Pertunjukan kebudayaan oleh anak-anak kapal tentera laut dari 16 negara adalah antara kelainan yang akan ditampilkan pada Pameran Maritim dan Udara Antarabangsa Langkawi (LIMA) 2013 yang bermula dari 26 hingga 30 Mac ini.

Menteri Pertahanan Datuk Seri Dr Ahmad Zahid Hamidi berkata sebelum ini pertunjukan itu diadakan secara tertutup di Awana Porto Malai di sini.

"Kali ini saya minta ia dipertontonkan kepada seluruh penduduk Langkawi dan pelancong domestik yang akan datang melawat LIMA kali ini," katanya kepada pemberita selepas menghadiri Majlis Pemimpin Bersama Rakyat Sempena LIMA '13 di Masjid Al-Istiqamah, Kuala Teriang di sini Khamis malam.

Katanya LIMA edisi ke-12 kali ini juga akan menyaksikan kehadiran paling ramai panglima tentera udara dan laut pada persidangan panglima tentera laut dan udara.

"Tidak kurang 20 negara untuk persidangan panglima tentera laut dan dan lebih 15 panglima udara. Itu belum lagi wakil atau timbalan panglima," katanya.

Katanya LIMA kali ini akan memperlihatkan lima pesawat tempur pelbagai peranan (MRCA) iaitu jet pejuang yang akan memperlihatkan pertunjukan udara selain pertunjukan berkumpulan.

Beliau berkata sehingga tengah hari semalam, penyertaan pempamer telah mencapai 97.8 peratus ruang pameran dengan sasaran awal hanya lima pavilion yang berdasarkan negara tetapi kini sudah mencapai tujuh.

Katanya selain itu, memandangkan LIMA berlangsung sewaktu cuti sekolah, pihaknya dengan kerjasama Kementerian Pelancongan akan mengadakan pameran dan pertunjukan penyediaan makanan pelbagai negeri di pekan Kuah.

Ahmad Zahid berkata beliau juga telah mengarahkan penganjur, HW Lima Sdn Bhd supaya memberikan 2,000 tiket percuma untuk penduduk Langkawi manakala tiket bagi orang ramai adalah RM10 bagi dewasa dan RM5 untuk kanak-kanak.

"Wang itu (jualan tiket) takkan digunakan syarikat itu tetapi akan didermakan kepada masjid-masjid seluruh Langkawi. Kutipan dua tahun lepas lebih RM160,000 telah didermakan," katanya.

LIMA'13 akan berlangsung di Dewan Pusat Pameran Antarabangsa Mahsuri (MIEC) bagi segmen udara dan di Awana Porto Malai bagi segmen maritim. Pameran di MIEC dibuka kepada orang awam pada 29 dan 30 Mac, manakala di Awana Porto Malai terbuka sepanjang LIMA '13 berlangsung.

Sementara itu, Ahmad Zahid berkata insiden pencerobohan penganjur dari selatan Filipina di Timur Sabah tidak akan menjejaskan penganjuran LIMA '13 dan beliau memberi jaminan akan keselamatan jet, kapal terbang dan kapal yang menyertai LIMA kali ini.

"Walaupun berwaspada kita tidak perlu khuatir. Dengan kekuatan anggota polis lebih 1,000 orang dan juga angkatan tentera udara, laut dan darat Insya-Allah takkan ada insiden

berlaku sepanjang LIMA," katanya.

Hadir sama pada majlis itu ialah Timbalan Menteri Pertahanan Datuk Dr Abdul Latiff Ahmad, Anggota Parlimen Langkawi Datuk Abu Bakar Taib dan Ketua Pegawai Eksekutif Lembaga Pembangunan Langkawi (Lada) Tan Sri Khalid Ramli.

Terdahulu, Zahid bersama penduduk Langkawi menunaikan solat Maghrib dan Isyak serta membaca Yassin dan Tahlil sempena penganjuran LIMA '13.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=934612>